



Alema 32–35

13–19 IULAI

Aisea ua Faasoa Mai ai e Alema le Tala ia Mose ma le Gata Apamemea?




I na ua uma ona faatusa-tusa e Alema le afioga a le Atua i se fatu (tagai i le Alema 32:28–43), sa fesili tagata ia te ia pe faapefea ona totō le fatu. Sa faaaoga e Alema le tala ia Mose ma le gata apamemea mai le Numera mataupu 21 e fai ma faataitaiga o le faatino-ina o le faatuatua (tagai i le Alema 33:19–23).

TALANOAGA

Na pau le mea e fai e tagata Isaraelu o le vaai ina ia faamaloloina ai. O a nisi o mataupu faavae o le talalelei ua foliga mai e faigofie e pei o le “vaai”? O a uiga faalia po o amioga e taofia ai i tatou i nisi taimi mai le ola ai i mataupu faavae faigofie o le talalelei?

E mafai faapefea ona e vaai atu i le Faola i mea e te oo i ai i aso taitasi?



O Se Faatusa o Keriso

O se *faatusa* o se mea e suitulaga pe ua faaataata mai ai se mea faitino po o se tagata. Ina ua utia tagata Isaraelu e gata uogo, sa sii i luga e Mose le gata apamemea, lea na avea ma se faatusa o Keriso. O i latou uma na faatinoina le faatuatua ma vaavaai atu i ai sa faamaloloina, e pei lava o i latou uma o e faatino lo latou faatuatua ia Iesu Keriso o le a faamaloloina faaleagaga.

O Nisi sa Faamaaa o Latou Loto

E tusa ai ma le faigofie o le vaai atu, o nisi o tagata na faamaaa o latou loto ma mumusu, ma na maliliu o se taunuuga o le utia. Aisea na latou le tetepa ai? (tagai Alema 33:20). O le a se mea ua aoao mai e lenei mea e uiga i le faatuatua ma le le talitonu?

Pe O Le A Faamaloloina Oe?

Afai e mafai ona faamaloloina oe e ala i le faia o se mea faigofie e pei o le vaavaai, e te le faia ea? Ua tuuina mai e Alema lenei fesili ma valaaulia i tatou e vaai atu i le Faola e ala i le talitonu ia te Ia (tagai i le Alema 33:21–22).